

2 Tīmuthiyus

¹ Yih khat Paulus kī taraf se hai jo Allāh kī marzī se Masīh Īsā kā rasūl hai tāki us wādā kī huī zindagī kā paighām sunāe jo hameñ Masīh Īsā meñ hāsīl hotī hai.

² Maiñ apne pyāre beṭe Tīmuthiyus ko likh rahā hūñ.

Ḳhudā Bāp aur hamārā Ḳhudāwand Masīh Īsā āp ko fazl, rahm aur salāmatī atā karen.

Shukrguzārī aur Hauslā-afzāī

³ Maiñ āp ke lie Ḳhudā kā shukr kartā hūñ jis kī k̄hidmat maiñ apne bāpdādā kī tarah sāf zamīr se kartā hūñ. Dīn rāt maiñ lagātār āp ko apnī duāoñ meñ yād rakhtā hūñ. ⁴ Mujhe āp ke ānsū yād āte haiñ, aur maiñ āp se milne kā ārzūmand hūñ tāki k̄hushī se bhar jāūñ. ⁵ Mujhe k̄hāskar āp kā muḳhlis imān yād hai jo pahle āp kī nānī Lūis aur māñ Yūnīke rakhtī thīñ. Aur mujhe yaqīn hai ki āp bhī yihī imān rakhte haiñ.

⁶ Yihī wajah hai ki maiñ āp ko ek bāt yād dilātā hūñ. Allāh ne āp ko us waqt ek nemat se nawāzā jab maiñ ne āp par hāth rakhe. Āp ko us nemat kī āg ko nae sire se bhaṛkāne kī zarūrat hai.

⁷ Kyonki jis Rūh se Allāh ne hameñ nawāzā hai wuh hameñ buzdil nahīñ banātā balki hameñ quwwat, muhabbat aur nazm-o-zabt dilātā hai.

⁸ Is lie hamāre Ḳhudāwand ke bāre meñ gawāhī dene se na sharmāeñ, na mujh se jo Masīh kī k̄hātir qaidī hūñ. Is ke bajāe mere sāth Allāh kī quwwat se madad le kar us kī

ḡhushḡhabrī kī ḡhātir dukh uṡhāeñ. ⁹ Kyoñki us ne hameñ najāt de kar muḡaddas zindagī guzārne ke lie bulāyā. Aur yih chīzeñ hameñ apnī mehnat se nahīñ miliñ balki Allāh ke irāde aur fazl se. Yih fazl zamānoñ kī ibtidā se pahle hameñ Masīh meñ diyā gayā ¹⁰ lekin ab hamāre Najātdahindā Masīh Īsā kī āmad se zāhir huā. Masīh hī ne maut ko nest kar diyā. Usī ne apnī ḡhushḡhabrī ke zariye lāfānī zindagī raushnī meñ lā kar ham par zāhir kar dī hai.

¹¹ Allāh ne mujhe yihī ḡhushḡhabrī sunāne ke lie munād, rasūl aur ustād muḡarrar kiyā hai. ¹² Isī wajah se main dukh uṡhā rahā hūñ. To bhī main sharmātā nahīñ, kyoñki main use jāntā hūñ jis par meñ imān lāyā hūñ, aur mujhe pūrā yaqīn hai ki jo kuchh main ne us ke hawāle kar diyā hai use wuh apnī āmad ke dīn tak mahfūz rakhne ke qābil hai. ¹³ Un sehbatbakhsh bātoñ ke mutābiq chalte raheñ jo āp ne mujh se sun lī haiñ, aur yoñ imān aur muhabbat ke sāth Masīh Īsā meñ zindagī guzāreñ. ¹⁴ Jo beshqīmat chīz āp ke hawāle kar dī gayī hai use Rūhul-quds kī madad se jo ham meñ sukūnat kartā hai mahfūz rakheñ.

¹⁵ Āp ko mālūm hai ki sūbā Āsiyā meñ tamām logoñ ne mujhe tark kar diyā hai. In meñ Fūgilus aur Hirmuḡhines bhī shāmil haiñ. ¹⁶ Ḳhudāwand Unesifurus ke gharāne par rahm kare, kyoñki us ne kāī dafā mujhe tar-o-tāzā kiyā. Hāñ, wuh is se kabhī na sharmāyā ki main qaidī hūñ. ¹⁷ Balki jab wuh Rom Shahr pahuñchā to baṡī koshishoñ se merā khoj lagā kar mujhe milā. ¹⁸ Ḳhudāwand kare ki wuh

qiyāmat ke din Ḳhudāwand se rahm pāe. Āp Ḳhud behtar jānte haiñ ki us ne Ifisus meñ kitnī Ḳhidmat kī.

2

Masīh Īsā kā Wafādār Sipāhī

¹ Lekin āp, mere beṭe, us fazl se taqwiyyat pāeñ jo āp ko Masīh Īsā meñ mil gayā hai. ² Jo kuchh āp ne bahut gawāhoñ kī maujūdaḡī meñ mujh se sunā hai use motabar logoñ ke sapurd karen. Yih aise log hoñ jo auroñ ko sikhāne ke qābil hoñ.

³ Masīh Īsā ke achchhe sipāhī kī tarah hamāre sāth dukh uṭhāte raheñ. ⁴ Jis sipāhī kī ḡyūṭī hai wuh ām riāyā ke muāmalāt meñ phañsne se bāz rahtā hai, kyoñki wuh apne afsar ko pasand ānā chāhtā hai. ⁵ Isī tarah khel ke muqābale meñ hissā leñe wāle ko sirf is sūrat meñ inām mil saktā hai ki wuh qawāyd ke mutābiq hī muqābalā kare. ⁶ Aur lāzim hai ki fasal kī kaṭāī ke waqt pahle us ko fasal kā hissā mile jis ne khet meñ mehnat kī hai. ⁷ Us par dhyān denā jo main āp ko batā rahā hūñ, kyoñki Ḳhudāwand āp ko in tamām bātoñ kī samajh atā karegā.

⁸ Masīh Īsā ko yād rakheñ, jo Dāūd kī aulād meñ se hai aur jise murdoñ meñ se zindā kar diyā gayā. Yihī merī ḲhushḲhabrī hai ⁹ jis kī Ḳhātir main dukh uṭhā rahā hūñ, yahañ tak ki mujhe ām mujrim kī tarah zanjīroñ se bāndhā gayā hai. Lekin Allāh kā kalām zanjīroñ se bāndhā nahīñ jā saktā. ¹⁰ Is lie main sab kuchh Allāh ke chune hue logoñ kī Ḳhātir bardāsht

kartā hūn tāki wuh bhī najāt pāeñ—wuh najāt jo Masīh Īsā se miltī hai aur jo abadī jalāl kā bāis bantī hai. ¹¹ Yih qaul qābil-e-etamād hai,

agar ham us ke sāth mar gae
to ham us ke sāth jieñge bhī.

¹² Agar ham bardāsht karte raheñ
to ham us ke sāth hukūmat bhī kareñge.

Agar ham use jānane se inkār kareñ
to wuh bhī hameñ jānane se inkār karegā.

¹³ Agar ham bewafā nikleñ
to bhī wuh wafādār rahegā.

Kyonki wuh apnā inkār nahīn kar saktā.

Qābil-e-Qabūl Khidmatguzār

¹⁴ Logoñ ko in bātoñ kī yād dilāte raheñ aur unheñ sanjīdagī se Allāh ke huzūr samjhāeñ kī wuh bāl kī khāl utār kar ek dūsre se na jhagareñ. Yih befāyda hai balki sunane wāloñ ko bigar detā hai. ¹⁵ Apne āp ko Allāh ke sāmne yoñ pesh karne kī pūrī koshish kareñ ki āp maqbūl sābit hoñ, ki āp aisā mazdūr nikleñ jise apne kām se sharmāne kī zarūrat na ho balki jo sahīh taur par Allāh kā sachchā kalām pesh kare.

¹⁶ Duniyāwī bakwās se bāz raheñ. Kyonki jitnā yih log is meñ phañs jāeñge utnā hī bedīnī kā asar barhegā ¹⁷ aur un kī tālīm kainsar kī tarah phail jāegī. In logoñ meñ Huminyus aur Filetus bhī shāmil haiñ ¹⁸ jo sachchā se haṭ gae haiñ. Yih dāwā karte haiñ ki murdoñ ke jī uṭhne kā amal ho chukā hai aur yoñ bāz ek kā imān tabāh ho gayā hai. ¹⁹ Lekin Allāh kī ṭhos buniyād qāym rahtī hai aur us par in do bātoñ kī muhr lagī hai, “Khudāwand ne apne logoñ ko jān liyā hai” aur

“Jo bhī samjhe ki main̄ Ḳhudāwand kā pairokār hūn̄ wuh nārāstī se bāz rahe.”

²⁰ Bare gharoñ meñ na sirf sone aur chāñdī ke bartan hote haiñ balki lakaṛī aur miṭṭī ke bhī. Yāñī kuchh sharīf kāmoñ ke lie istemāl hote haiñ aur kuchh kamqadar kāmoñ ke lie. ²¹ Agar koī apne āp ko in burī chīzoñ se pāk-sāf kare to wuh sharīf kāmoñ ke lie istemāl hone wālā bartan hogā. Wuh maḳhsūs-o-muḳaddas, mālik ke lie mufīd aur har nek kām ke lie taiyār hogā. ²² Jawāñī kī burī ḳhāhishāt se bhāḡ kar rāstbāzī, imān, muhabbat aur sulah-salāmatī ke pīchhe lage raheñ. Aur yih un ke sāth mil kar kareñ jo ḳhulūsdilī se Ḳhudāwand kī parastish karte haiñ. ²³ Hamāqat aur jahālat kī bahsoñ se kinārā kareñ. Ap to jānte haiñ ki in se sirf jhagaṛe paidā hote haiñ. ²⁴ Lāzim hai ki Ḳhudāwand kā ḳhādīm na jhagaṛe balki har ek se mehrbāñī kā sulūk kare. Wuh tālīm dene ke qābil ho aur sabar se ḡhalat sulūk bardāst kare. ²⁵ Jo muḳhālafat karte haiñ unheñ wuh narmdilī se tarbiyat de, kyoñki ho saktā hai ki Allāh unheñ taubā karne kī taufīq de aur wuh sachchāī ko jān leñ, ²⁶ hosh meñ aeñ aur Iblīs ke phande se bach nikleñ. Kyoñki Iblīs ne unheñ qaid kar liyā hai tāki wuh us kī marzī pūrī kareñ.

3

Āḳhirī Din

¹ Lekin yih bāt jāñ leñ ki āḳhirī dinon̄ meñ haulnāk lamhe aeñge. ² Log ḳhudpasand aur paison̄ ke lālchī hoñge. Wuh sheḳhībāz, maḡhrūr, kufr bakne wāle, māñ-bāp ke

nāfarmān, nāshukre, bedīn ³ aur muhabbat se khālī hoṅge. Wuh sulah karne ke lie taiyār nahīn hoṅge, dūsron par tohmat lagāeṅge, aiyāsh aur wahshī hoṅge aur bhalāī se nafrat rakheṅge. ⁴ Wuh namak-harām, ghairmuhtāt aur ghurūr se phūle hue hoṅge. Allāh se muhabbat rakhne ke bajāe unheñ aish-o-ishrat pyārī hogī. ⁵ Wuh bazāhir khudātars zindagī guzāreṅge, lekin haqīqī khudātars zindagī kī quwwat kā inkār kareṅge. Aisoñ se kinārā kareñ. ⁶ Un meñ se kuchh log gharoñ meñ ghus kar kamzor khawātīn ko apne jāl meñ phaṅsā lete haiñ, aisi khawātīn ko jo apne gunāhoñ tale dabī huī haiñ aur jinheñ kā tarah kī shahwateñ chalātī haiñ. ⁷ Go yih har waqt tālīm hāsil kartī rahtī haiñ to bhī sachchāī ko jānane tak kabhī nahīn pahuñch saktīñ. ⁸ Jis tarah Yannes aur Yambres Mūsā kī muḥhālafat karte the usī tarah yih log bhī sachchāī kī muḥhālafat karte haiñ. In kā zahan bigarā huā hai aur in kā imān nāmaqbul niklā. ⁹ Lekin yih zyādā taraqqī nahīn kareṅge kyoñki in kī hamāqat sab par zāhir ho jāegī, bilkul usī tarah jis tarah Yannes aur Yambres ke sāth bhī huā.

Ākhirī Hidāyāt

¹⁰ Lekin āp har lihāz se mere shāgird rahe haiñ, chāl-chalan meñ, irāde meñ, imān meñ, sabar meñ, muhabbat meñ, sābitqadmī meñ, ¹¹ izārasāniyoñ meñ aur dukhoñ meñ. Antākiyā, Ikuniyum aur Lustrā meñ mere sāth kyā kuchh na huā! Wahāñ mujhe kitnī saḥt izārasāniyoñ kā sāmnā karnā parā. Lekin Khudāwand ne mujhe in sab se rihāī dī. ¹² Bāt yih hai ki sab

jo Masīh Īsā meñ ḵhudātars zindagī guzārnā chāhte haiñ unheñ satāyā jāegā. ¹³ Sāth sāth sharīr aur dhokebāz log apne ḡhalat kāmoñ meñ taraqqī karte jāeñge. Wuh dūsroñ ko ḡhalat rāh par le jāeñge aur unheñ ḵhud bhī ḡhalat rāh par lāyā jāegā. ¹⁴ Lekin āp ḵhud us par qāym raheñ jo āp ne sīkh liyā aur jis par āp ko yaqīn āyā hai. Kyoñki āp apne ustādoñ ko jānte haiñ ¹⁵ aur āp bachpan se muqaddas sahifoñ se wāqif haiñ. Allāh kā yih kalām āp ko wuh hikmat atā kar saktā hai jo Masīh Īsā par īmān lāne se najāt tak pahuñchātī hai. ¹⁶ Kyoñki har pāk nawishtā Allāh ke Rūh se wujūd meñ āyā hai aur tālīm dene, malāmat karne, islāh karne aur rāstbāz zindagī guzārne kī tarbiyat dene ke lie mufīd hai. ¹⁷ Kalām-e-muqaddas kā maqsad yihī hai ki Allāh kā bandā har lihāz se qābil aur har nek kām ke lie taiyār ho.

4

¹ Main Allāh aur Masīh Īsā ke sāmne jo zindon aur murdoñ kī adālat karegā aur us kī āmad aur bādshāhī kī yād dilā kar sanjīdagī se is kī tākīd kartā hūñ, ² ki waqt bewaqt kalām-e-muqaddas kī munādī karne ke lie taiyār raheñ. Baṛe sabar se īmāndāroñ ko tālīm de kar unheñ samjhāeñ, malāmat kareñ aur un kī hauslā-afzāi bhī kareñ. ³ Kyoñki ek waqt āegā jab log sehhatbaksh tālīm bardāsht nahīn kareñge balki apne pās apnī burī ḵhāhishāt se mutābiqat rakhne wāle ustādoñ kā dher lagā leñge. Yih ustād unheñ sirf dil bahlāne wālī bāteñ sunāeñge, sirf wuh kuchh jo wuh sunanā chāhte haiñ. ⁴ Wuh

sachchāi ko sunane se bāz ā kar farzī kahāniyon ke pīchhe paṛ jāeṅge. ⁵ Lekin āp ḡhud har hālat meṅ hosh meṅ raheṅ. Dukh ko bardāshṡt kareṅ, Allāh kī ḡhushḡhabrī sunāte raheṅ aur apnī ḡhidmat ke tamām farāyṡ adā kareṅ.

⁶ Jahān tak merā tālluḡ hai, wuh waḡt ā chukā hai ki mujhe mai kī nazar kī tarah qurbāṅgāh par unḡelā jāe. Mere kūch kā waḡt ā gayā hai. ⁷ Maiṅ ne achchhī kusṡtī laṛī hai, maiṅ dauṛ ke iḡhtitām tak pahuṅch gayā hūn, maiṅ ne īmān ko mahfūz rakhā hai. ⁸ Aur ab ek inām taiyār paṛā hai, rāstbāzī kā wuh tāj jo ḡhudāwand hamārā rāst munsif mujhe apnī āmad ke din degā. Aur na sirf mujhe balki un sab ko jo us kī āmad ke ārzūmand rahe haiṅ.

Kuchh Shaḡhsi Bāteṅ

⁹ Mere pās āne meṅ jaldī kareṅ. ¹⁰ Kyoṅki Demās ne is duniyā ko pyār karke mujhe chhoṛ diyā hai. Wuh Thissalunīke chalā gayā. Kreskens Galatiyā aur Titus dalmatiyā chale gae haiṅ. ¹¹ Sirf Lūḡā mere pās hai. Marḡus ko apne sāṡh le ānā, kyoṅki wuh ḡhidmat ke lie mufīd sābit hogā. ¹² Tuḡhikus ko maiṅ ne Ifisus bhej diyā hai. ¹³ Āte waḡt merā wuh kūṡ apne sāṡh le āeṅ jo maiṅ Troās meṅ Karpus ke pās chhoṛ āyā thā. Merī kitābeṅ bhī le āeṅ, ḡhāskar charmī kāḡhaz wālī.

¹⁴ Sikandar lohār ne mujhe bahut nuḡsān pahuṅchāyā hai. ḡhudāwand use us ke kām kā badlā degā. ¹⁵ Us se muḡtāt raheṅ kyoṅki us ne baṛī shiddat se hamārī bātoṅ kī muḡhālafat kī.

¹⁶ Jab mujhe pahlī dafā apne difā ke lie adālat meñ pesh kiyā gayā to sab ne mujhe tark kar diyā. Allāh un se is bāt kā hisāb na le balki ise nazarandāz kar de. ¹⁷ Lekin Ḳhudāwand mere sāth thā. Usī ne mujhe taqwiyāt dī, kyoñki us kī marzī thī ki mere wasīle se us kā pūrā paighām sunāyā jāe aur tamām Ḡhairyahūdī use suneñ. Yoñ Allāh ne mujhe sherbabar ke muñh se nikāl kar bachā liyā. ¹⁸ Aur āge bhī Ḳhudāwand mujhe har sharīr hamle se bachāegā aur apnī āsmānī bādshāhī meñ lā kar najāt degā. Us kā jalāl azal se abad tak hotā rahe. Āmīn.

Ākhirī Salām

¹⁹ Priskillā, Akwilā aur Unesifurus ke gharāne ko hamārā salām kahnā. ²⁰ Irāstus Kurinthus meñ rahā, aur mujhe Trufimus ko Miletus meñ chhoṇā paṛā, kyoñki wuh bīmār thā. ²¹ Jaldī karen tākī sardiyoñ ke mausam se pahle yahāñ pahuñcheñ.

Yūbūlus, Pūdens, Līnus, Klaudiya aur tamām bhāī āp ko salām kahte haiñ.

²² Ḳhudāwand āp kī rūh ke sāth ho. Allāh kā fazl āp ke sāth hotā rahe.

Kitab-i Muqaddas

The Holy Bible in Urdu, Urdu Geo Version, Roman Script

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-11-30

PDF generated using Haiola and XeLaTeX on 22 Feb 2024 from source files dated 13 Dec 2023

123ff8cb-27b3-5817-a02a-22e67145fd30